

LES

# PSEAVMES DES COVRTISANS,

Dediés aux braues esprits qui entendent  
le jars de la Cour.

---

M. DC. XX.

THE NEWBERRY  
LIBRARY

Case  
F

39

, 326

1620p

---

LES PSEAVMES DES  
COURTISANS.

Dediés aux braues esprits qui entendent  
le jars de la Cour.

**A**Vrelius Ancien & sage Iuriscōsulte, blasmoit à bon droict le nombre infiny des loix de son temps: & pour faire vn abregé dist librement à celuy qui demandoit: Quales sunt vestra leges, Quales volumus, dit-il, Quelles sont vos Loix, telles que nous voulons & adiousta disant: Parce que nos liures de Loix, sunt multorum Camelorum onus, sont des charges de plusieurs Chameaux.

Auiourd'huy on ne veut point de grāds liures de Deuotion, on les abrege tous les iours, aussi sont ils plus aisez à porter à la pochette: & notamment les Pseumes Pœnitentiels, qui portent quant & eux toute ceste mouëlle & substance de Deuotion. Nos Courtisans de maintenant n'en veulent point de longs, en voicy vn abregé qu'ils offrēt au Roy pour se deliurer des inconueniens qui les menacent.

En la societé humaine il ne faut point tant d'escritures & de liures, il n'y a que deux points, Aymer Dieu & seruir le Roy. Qui aymera Dieu seruira le Roy, c'est l'Oingt de Dieu & son bien-aymé: n'yra point courir la poste & prestantaine à la desesperade, pour s'aller canton-

A ji



4

ner l'un à Dieppe, l'autre au Pont de Sé, l'autre à Caen, l'autre à Angoulesme, l'autre ie ne sçay où: & ce pendant il faut toujours apres ces escapades venir baiser la botte a nostre bon Maistre, nostre braue Louys, qui les escarte comme le foudre & tonnerre: il faut venir à la Creiche, reuenir à la maison, & que l'enfant prodigue crie, ( Peccauit in cœlum & contrate.) J'ay peché contre le Ciel, & contre vous, ô mō Roy, ayez pitié de moy, misericorde.

Voyla pourquoy le bon Comte d'Auuergne ayant eu du loisir assez, voire de reste, pour penser à ses affaires, pres la porte S. Anthoine, estât de Retour au Louure, presente son humble requeste au Roy, la larme à l'œil, le verset de son Psalme Pœnitentiel: Domine ne in furore tuo arguas me, neque in ira tua corripas me.

C'est bien faict, bon Comte mon amy, vous aurez recompense, faut estre sage, vaut mieux tard que iamais: precepta docent, exempla mouent: Quand mon voisin se noye, ie tasche à me sortir de l'eau: Ha, pauure Biron, ta teste par terre à faict peur à plusieurs: mais ç'a esté vne belle aduance, car comme on dit, & il est vray aussi, la mort des Loups c'est la santé des brebis: le sage Periander, vn des sept Sages de Grece le montra autrefois à son Roy, nouuellement arriué à la Couronne: il couppa en sa presencè dās vne grande plaine de bleds tous les grands espics qui s'orgueillissoient en surpassant les autres, & dist au Roy: Fay de mesme en ton Royaume, & tu n'auras point d'ennemis.

Le Sage Seneque, en sa Tragedie d'Hercule

5

aduertit les mauuais garçons & leur dit le voyant  
pres de leur ruine.

( Timere, ô superi, fata.

La fin paye tout: au bout du ieu on void  
qui a gagné. Prenez garde remueurs d'affai-  
res, & qui osez contrecarrer les volonte de  
nostre Roy: le voila armé il a la force en main,  
son fort Sceptre vous menace que ferez vous?  
reuenez de bonne heure & luy demandés par-  
don: celuy de Guyenne, encor qu'il soit bien  
haut esleué en jambes, a neantmoins tremblé,  
& se mettant à genoux deuant nostre ieune  
grand Roy, que Dieu conserue, luy dist à main  
ioincte sa petite deuotion ( Penitentielle, Mise-  
rere mei Domine quoniam infirmus sum: sana  
me Domine, quoniam conturbata sunt ossa  
mea ) Il y en aura bien d'autres qui en diront  
autant. Je vous assure, ce n'est pas sans occa-  
sion que vous auez eu telle vezarde: la fureur &  
iuste colere du Roy, c'est vn messager de mort.

Son parent s'estant recogneu de bonne heu-  
re, ne veut point estre de contraire party: car  
le Roy le recompense en Auvergne, & pource  
il dist à ceux de sa maison. [ Discedite à me om-  
nes qui operamini iniquitatem, quoniam exau-  
diuit Dominus vocem fletus mei. ) Et partant  
la sage Royne Mere luy promet ( Si sic sauius te  
nutrio te vestrio.

Auant que commencer ces temeraires fou-  
cades, faut prendre garde, mes amys, qu'au lieu  
de l'eau on ne mette le feu en la maison.

Pour Phare, il faut auoir la cognoissance des  
affaires.



Pour Pilote, le iugement,  
 Pour auirons le soyn & le traual, pour bien  
 & fidelement seruir son Roy & Maistre souue-  
 rain.

Pour voile, la diligence pour executer ses  
 iustes volonteiz & commandemens.

Pour gouuernail la discretion, pour ne cau-  
 ser & murmurer.

Et pour Nort, & Cynosure asseuree le seruice  
 de Dieu & du bien public.

A ceste occasion ceste pauvre C. d'aupres  
 Fontaine bleau, n'ayant bien conduict ses af-  
 faires, se plainct à vn certain maistre de Poste,  
 grand Greffier d'Amour, fort bien recogneu en  
 Frâce par les ruses de son estat, & luy dist com-  
 me Calisto enceinte par Iupiter, [*Laborau in  
 gemitu meo, lauabo per singulas noctes lectum  
 meum, lachrymis meis stratum meum rigabo.*]  
 Il n'est plus temps de plorer, Marion est grosse,  
 l'enfant à dequoy viure, il a bon pere pleust à  
 Dieu qu'il fust en vie.

Celuy qui demeuroit au Chasteau du Ga, ce  
 braue Beniste a Bordeaux, plorant d'un œil, se  
 plaint & dit, (*Conturbatus est oculus meus  
 à furore tuo, inueterauit inter omnes inimicos  
 meos.*) Faiçtes bien tous & dictes avec le Mar-  
 quis de Roüillac: (*Exaudiuit Dominus oratio-  
 nem meam. Dominus orationem meã suscepit.*)

Ha! petites nuées vous auez esmeu les flots &  
 l'Ocean de nostre grand Neptun, qui auant  
 que mettre la main à la verge, faiçt retentir par  
 tout son formidable, *Quos ego?* qui sôt ces ga-  
 lands? qui sont ces temeraires? le vous auray

sans courir guerres loing. Mais que leur dist-il en disant seulement ce petit verset de son Psautier, [ Erubescant & conturbentur vehementer omnes inimici mei: conuertantur & erubescant valde velociter: ] les voila par terre tous estonnez, les voila en fuitte: mais reuenez il est debonnaire, il vous pardonnera, comme ie croy, ainsi la iuste victoire demeurera en ses mains, nous dirons avec la bonne Royne Mere, *Gloria Patri & filio, &c.*

Le bon Duc des Ardennes, regardant de loing quel temps il fera, de quel costé cherra la gresse sur les montaignes trop esleuees, se frappant la poitrine dit piteusement, Helas! [ *Beati quorū remissæ sunt iniquitates, & quorū tecta sunt peccata:* ] ô que bien-heureux sôt ceux auxquels les fautes & iniquitez sont pardonnees & remises, & desquels les pechez sont couuerts: voila pourquoy ie n'ose aller à Paris, quand i'y aurois toutes les affaires du monde, il n'y a que les fosses de la Bastille qui me faschent: i'ay peur que si la siebure m'y saisissoit on ne me fist trop tirer de sang des parties iugulaires pour la guarir, le desgoust m'en causeroit peut-estre la mort, & par ce moyen seroit fait de moy: l'air de la Bastille & de la maison de Ville & du tout contraire à ceux de ma complexion, plusieurs y sont morts soudainement, abandonnez des Medecins, qui n'y ont iceu ny peu remedier.

Autant en dit celuy qui faisoit tirer des boulets de bourre & de foin contre bony dernièrement, & qui a payé ses debtes aux dépens du Roy, ainsi tout ioyeux il dist, *Beatus vir cui non*



imputant Dominus peccatum, ô qu'heureux est l'homme qui faisant semblant de tenir pour le Roy, estant d'accord avec l'armee contraire, & grappilloit de deux costez, son peché luy a esté pardonné, & a faict accroire que, [in spiritu eius non erat dolus, encor qu'il soit des moins courageux & versez à la guerre: n'auoit il pas bon esprit? ouy, aussi est-il Marechal, ô qu'il ferre sans enclouër la beste.

Le Baron de S. Chaman n'a point trop faict le mauuais, il dit franchement & de bonne heure au Roy. *Dilectum meū cognitum tibi feci, & iniustitiam meam non abscondi.* Passez retirez vous, on vous pardōne, aux autres despeschons.

Le pretendu Connestable auquel on approprie la deuise de l'Empereur Ortho 4. *Anser strepit inter Olores*, aussi n'est-il qu'un Oyson, qui ne sçait que, ouy ouy net, entre les braues & melodieux Cygnes, voyant son cas fort sale & plein d'ordure qui put de tous costez, tout espouuanté, & tremblant comme la fueille, ne voyant desormais lieu plus asséuré pour se cacher, & se sauuer de la ruyne qui le menace de pres, se tempestant & iettant à genoux, pleurant comme vn lasche perdu aux pieds du Roy, dist, Ha, Sire, Ne derelinquas me, ne discesseris à me, tout s'en va la victoire est perduë mō for, m'a trompé, mon petit liure de parchemin vierge & mes figures me manquent au besoin: O cruelle fortune, te ioüies-tu ainsi de moy, Helas: Sire, c'est en vous que j'espere. Tu es *refugiū meum à tribulatione quæ circumdedit me: erue me à circūdantibus me.* Pour Dieu, Helas, Sire,



Sire, ayez pitié de moy, & encore que ie vous aye volé tout vostre argēt, & que ie vous aye pipé tant de belles places & si importātes, i'aime mieux quitter tout & m'enfuyr que d'attendre le coup mortel de ma ruine. Le vous ay trop offensé, & toute la France: mon orgueil, ma perfidie me portent au desespoir, ie suis miserable si n'avez pitié de moy: i'ay offensé tout le monde, & ne sommes plus dignes mes freres & moy de leuer les yeux au Ciel & vers vous pour obtenir misericorde: Helas! que feray- ie? ie n'en puis plus: que plust à Dieu que ie n'eusse iamais quitté mes pauvres moineaux: pleust à Dieu que ie fusse encore en nostre pauvre cahuë de maison à Mornas, ou chez Mōsieur le Comte de Lude, mon bon maistre, où moy & mes freres auions du pain nostre saoul: on bien chez Monsieur l'Euesque de Carcassonne, qui a tant fait de bien à mon pauvre pere, & à nous autres freres, qu'il a tousiours taiché d'aduançer quād nous luy portions des oiseaux: mais pauvre récompense en a il eu. Je ne serois point en la peine ou ie me vois plongé. Helas mes freres, Bran, Cadnet, sauuez- vous. (Nolité fieri sicut equus & mulus quibus non est intellectus:) il est temps de gagner au pied, & tost, autrement nostre cas va mal: car i'ay ouy de terribles nouuelles qu'on a dict au Roy, i'estois caché derriere la tapisserie, où ie vessois de peur comme vn Renard. [ In chamō & freno maxillas eorum: ] ô le rude Cōseil pour nous & pour beaucoup d'autres qui ne valent pas mieux que nous.

Ha, miserable, qui te fait auoir telle peur? c'est

la conscience, qui est vn Dieu dans l'homme, & qui vaut mille tefmoins Oû pensiez vous monter paüres aubereaux? champignons nays en vne nuict?

L'or & l'yuoire du Palais de Menelaus.

La pierre precieuse de Sylla, Dictateur Rom.

La Dactilothèque, ou buffet éperlé de Scaurus.

Le manteau d'or d'Agripinne.

L'or de Tygranes & Mitridates.

Bref, le reluyfant Chariot de Sefostris ne peuvent estre parangonnez aux richesses qu'avez frauduleusemēt attrappé en moins de trois ans, pipant le Roy, estant auparauant plus incognus que l'origine & source du Nil: mais vous en payerez les pots cassez, ou raison manquera: car nous esperons tant en la Iustice du Roy, qu'ayāt descouuert vos tromperies & subtils moyens, il vous desconurira aussi, & vous traittera selon vos demerites, à vostre honte & confusion, & au contentement de gens de bien.

Et ne seruira de rien ce que l'autre vous souffle aux oreilles, & qui fait tant de poursuittes pour vous, disant, intellectum tibi dabo, & instruam te in via hac, qua gradieris firmabo super te oculos meos. C'est baille luy belle, & de tout rien.

La Prophetie de ce valeureux Seigneur qui arresta l'orgueil de Conchin sur le pont du Louure, sortira son effect, à la ioye du public: c'est vn poinct fort dangereux de iouër avec le Roy, & faire le compagnon aue luy: *Ipsi peribunt*, dit-il, tu autem permanes, & hi tres, sicut vesti-



mentum veterascent.

Semblable Prophetie a esté prononcee par vne Dame de la Cour, disant ( Filij tui non habitabunt, semen eorum non dirigetur.

Iob 4. chap. dit, Eleuati sunt superbi ad modicum, & non subsistent. Les orgueilleux sont esleuez pour vn peu de temps, mais ils ne subsisteront point: ce ne sera qu'vn sommeil & songe trompeur d'vne nuict, peribit cum somno memoria somni.

Et pourtant cét admirable pere Arnoux, qui fait œuures nompareilles, qui est actif, vigilant, remuant, tout sçachant, qui va, qui court, qui trotte par toutes les chambres du Louure, & en carosse par toute la ville, en grande humilité, qui sçait toutes sortes de nouuelles, aussi a il vn bon esprit, car il entend principallemēt & auāt tout mieux le nombre d'or que la lettre Dominicale, a iuré par foy, & nous la promis, afin de donner ordre par tout, qu'il fera valoir ceste article de son Psaultier, quād il luy deuroit couster le Chapelet de sa ceinture, aussi bien n'en fait il rien, ( Docebo iniquos vias tuas Domine, & impij ad te cōuertentur, Dieu le vueille, mais i'ay peur qu'il ne l'oublie, car il se donne trop d'affaires, ce qui le rend ainsi maigre & hideux. Monsieur de Vendosme cognoissant l'impossibilité de ses vains desseins, a remarqué le lieu d'où vient le deffaut, parce qu'il l'a trouué dans son Psalme Penitentiel: Ecce in iniquitatibus conceptus sum, & in peccatis concepit me mater mea: telles gens ne sont gueres suiets à bien faire: toutes-fois il promet, à se de Dio, de ser-

uir le Roy son maistre, & faire bien s'il peut.

Monsieur le General des Galeres, pour se monstrier galant homme, propre, net, & bien accommodé aupres du Roy, auant que s'y presenter demande au Roy par ce motet de son Psautier abregé: ( Asperges me Domine hyssopo, & mundabor, lauabis me, & super niuem dealbabor. Ha! qu'il le fera bon voir, non pas si noir que de coustume: estant ainsi blanchi il pourroit obtenir quelque benefice sur le Spirituel ou temporel, par le moyen de Monsieur le Cardinal son frere: mais le grād Cardinal de la Rochefoucault, grand Aumosnier de France, &c. grand Euesque de Senlis: grand Abbé de Sainte Geneuiefue, a six grands cheuaux au grand Carosse, accōpagné de ces grands Aumoniers, s'oppose à tout cela & dit, ( Primò mihi, car il a protesté à tous les pauvres estropiés & autres, d'observer religieusement ce verset de son Psautier, sans l'enfreindre en aucune façon, duquel il se sert fort bien sans rien despendre: Et factus sum sicut homo non audiens, & non habens in ore suo loquelas. Et ainsi à Dieu mes amis, n'attēdez plus, l'Aumosnier serre la porte.

Monsieur d'Espèrnon se plaint merueilleusement de ceux de la maison de Guyse, disant, Inimici mei viuunt & confirmati sunt super me, & multiplicati sunt qui oderūt me iniquè. Je croy que cela est vne partie cause de son long sejour à Angoulesme, & qu'il n'ose venir à Paris, mais il y a bien autre chose avec du Catus. Toutesfoiς on dit que s'il plaist au Roy de luy pardonner il demande à Dieu pour venir en assurance



en Cour, *Cor mundum crea in me Deus, & spiritum rectū innoua in visceribus meis*: Cela sera bon, faire comme le serpent, quitter la vieille peau: & criant mercy au Roy, semble le promettre disant, *Miserere mei Deus secundum magnam misericordiam tuam, & secundū multitudinē miserationum tuarū, dele iniquitatem meam*. Son fils de Candale en promet le mesme par la supplicatiō qu'il faict au Roy, disant, sans toutesfois s'amender, *Iniquitatem meam ego cognosco, & peccatum meum contra me est semper*, Il est vray, mais il doit dire avec le bon homme Marechal de la Chastre: *Auerte faciem tuam à peccatis meis, & omnes iniquitates meas dele*. Et avec Madame des Essars qui toute tremblante & chenuë est aux pieds du Roy, & dit, *Ne proicias me à facie tua, & spiritum sanctum ne auferas à me*, car ie n'en puis plus.

On dit encor, que Monsieur de Bouillon fait vn merueilleux tintamarre dans Sedan, il se fache & s'agriette d'estre si longtemps sans voir Paris, mais il craint seulement ce que dessus, & ne laisse pourtāt, quoy qu'il soit de la Religion, de dire bien deuotement son *Deprofundis clamaui ad te Domine: Domine exaudi orationem meam, Fiant aures tuæ intendentes in vocem depræcationis meæ*: car il dit, avec Monsieur qui gardoit autrefois l'Arsenal & la Bastille: *Si iniquitates nostras obseruaueris Domine: Domine quis sustinebit* Qui ben sta non se moue, dit l'Italien.

Je ne sçay que Mōsieur de la Varenne a faict:

il crie nuict & iour comme s'il estoit fol, *Mea culpa, mea maxima culpa: Ideo precor Mariam,* afin qu'elle ne me chastie, à cause de deux Dames, qui ont tenu sa place long-temps par mon moyen.

Finalemēt les nouvelles arriuent d'une bonne & asseuree paix, tous les mauuais garçons viennent prester hommage de fidelité & obeissance au Roy, luy demandant tres-humble pardon pour les fautes passees, & de n'y retourner iamais plus. Tellemēt que le Cardinal de Guise oyant ces bonnes nouvelles, de grand ioye a ietté sous la table cartes & dez: & encor qu'il ne s'accompagne gueres souuents du Crucifix qu'aux festes solennelles il s'est mis à chanter tant qu'il a peu & du mieux qu'il a sceu son verset, *Domine labia mea aperies, & os meum annuntiabit laudem tuam,* Dieu le vueille, ce qui sera vne grande merueille.

Monsieur l'Esdiguières s'est ioinct miraculeusement au Psaultier racourcy des Courtisans, & se repentant, demande à Dieu, *Domine doce me facere voluntatem tuam, quia surdus sum.*

Monsieur de Guyse fermant le Psaultier, & le mettant sur le buffet iusques à ce qu'on en eust affaire, a protesté deuant le Roy de sa fidelité pour l'aduenir, disant humblement, *Domine ne reminiscaris delicta nostra, vel parentum nostrorum, neque vindictam sumas de peccatis nostris.*

Tellement qu'à ce coup on espere que Monsieur de Rosny ne se sera point mocqué, lors



qu'il monstroit la Bastille au Roy, assez meublee de monnoye, & l'Arsenal bien peuplé de canons & de poudre, luy dist: Timebunt gentes nomen tuum, & omnes Reges terræ gloriam tuam. La tres-bonne Mere Royne voyant sa bonne affection, a fort affectueusement intercedé pour luy enuers le Roy, disant, Non intres in iudiciū cum seruo tuo, quia non iustificabitur in conspectu tuo. Il ne sçauoit, car il ne sçait pas le nombre des oyseaux qu'il a desniché de la Bastille: il a faict ses vandanges tandis qu'il y auoit des grappes en la vigne, pardonnez luy, aussi bien n'en peut il plus, laissez luy acheuer ses iours paisiblement, il n'est pas seul qui vous a pillé, il y en a bien d'autres qui font les bons valets aupres de vous.

Voyla finalement le ieu des guerres d'aujourd'hui aussi bien qu'au passé: c'est vne vraye rouë de Fortune, le premier qui paye les frais c'est le pauvre paysan.

Tout est-il gasté & mangé par les champs? faut faire la paix.

La paix est-elle faicte? on deuient aussi tost trop gras.

Est-on trop gras & à l'aise? on deuient trop riche.

Est-on trop riche? on deuient orgueilleux.

Est-on orgueilleux? alors il se faut mutiner, il se faut cantonner, faire le mal-content.

Est-on mal content? faut faire la guerre.

La guerre est-elle faicte? voyla paureté & famine qui arriue.

Paureté ameine humilité: & finalement

l'humilité rameine la paix, ainsi voila vn braue ieu.

Le bon Mareschal de Brissac ayant veu tous ces tours,retours & ieux de Fortune s'appuyant sur son baston, ou porté dans vne chaire, tout gousteux, souspire & dit, Putruerunt & corruptæ sunt cicatrices meæ à facie insipientiæ meæ. Hé il est bien temps. Le reste sera pour vne autre fois.

C'est donc en somme tout ce que nous auons de nouveau. Dieu face la grace à nostre bon Roy de viure longuement & heureusement aymé, chery, & redouté de tous ses sujets. Surquoy toute la France chante & dit, Viuat Rex in æternum, vt conculcet pedibus omnes inimicos suos. Amen.

- F I N.